

# Poldi Efesohidok pepa youyemguk

## Yodakale Mede

Pepa yon adi mebi indin doktiņa youyemguk. Bepanđi nemenemek hogohogok kunum gineņ be kwetfoloņ hadapmalak u Jesu kohon foloņ kamedapmaguk. Tiņa Jesu ne adi nemenemek hogohogok wendiniņ daņiniņ (1.10), kaņ Bepanđi metam welehiķ tubulodaune Kilisto Jesu dut wooņ galiņa welekubugoņ tiinđ.

Pepa faki timeņ youkuk woņadi Bepaņ'walaņ siloņ tobogoņđi metam yehitubulodaune Jesu nadisukilitimiņa metam bop kubugoņ mintaiņ. Jesudi kwanai unduņ tuguk doktiņa Bepanđi metam koti yanagikuk, tiņa yofoloķiņ takaliņa nemek momohi noli kougoņ tiyemdok hatune tububihila Uņgoniņ Munabuli timeņ yemguk (1.14).

Pepa faki mindaņ youkuk woņadi indin youyemguk. Adi agoņ Jesu dut wooņ galiinđ doktiņa Bepaņ'walaņ nadinadi eņ titiņ takalidok adi welekubugoņ taneeņ. Pepa yendok gineņ Poldi nemek niņ metam yenindakaleeņ yoyout mede gineņ yoguk e indin. Metam neeņ Jesu dut galiinđ adi kubugoņ mintaiņ. Ala metam adi folooņ lekiņgoņ unduņ tiinđ kaņ Jesu ne mebi tilak (4.1-6). Tiņa undugoņ metam adi yot niņ nabugoņ kaņ Wapum ne adi yot wendiniņ daņiniņ (2.19-22). Tiņa undugoņ Bepaņ'walaņ metam adi yadi tam niņ unduņ kaņ Wapum ne yohoi unduņ tilak (5.22-32). Pepa yendok gineņ adi Bepanđi metamņiye nemek momooņ tiyemdok nadilak wendiniņ mede hogok hatak.

## Yokahaņ

**1** <sup>1</sup> Pol nu Bepaņ'walaņ nadinadi takaliņa Jesu Kilisto'walaņ aposel tugutdi Efesohi Bepaņ'walaņ metam, Kilisto Jesu biyagoņ hineķ nadisukilitimiinđ hiditok pepa i kamehamulat. <sup>2</sup> Betnik Bepaņ eņ Wapum Jesu Kilisto adi'walaaniņ siloņ tobogoņ eņ kulema hidi'walaņkade haliwooņ hatuwaak.

## Jesu namanda gineņ weleniķ walaņiņ hatidok

<sup>3</sup> Wapumnik Jesu Kilisto'walaņ Bepaņ eņ Beu, adi Kilisto doktiņa munabulinik tubulodadok kunum gineniņ kahaņ mebimebi tinimguk.

Unduŋ doktiŋa wou nintiloŋ niutumbayaneem. <sup>4</sup>Adi koomkwaha hinek kwet diniŋ daŋiniŋ hakiliti mu mintalune namanda gineŋ welenik walanŋ eŋ kadakanŋnit mokit hatidok nadiŋa Kilisto gut kadine netok gigit nihidaneguk. <sup>5</sup>Biyagoŋ kuyoŋ, adi yadi timenŋ nadiune hakuk ala Jesu Kilisto doktiŋa welesiloŋ tinimiŋa wapmihiniŋye hatidok ninindapmaguk. <sup>6</sup>Adi yadi mihiniŋ momooŋ doktiŋa siloŋ tobogoŋ saŋiniŋnit tinimguk ala kibi indibo tonadifo tiŋa niutumbayaneem.

### **Jesu'walaŋ naŋgatdi tuwanik kameune nihisidokoguk**

<sup>7</sup>Jesu adi naŋgatŋiŋdi tuwanik kameune nihisidokoune Bepaŋdi kadakanŋnik tumolokutnimguk. Biyagoŋ kuyoŋ, uyadi siloŋ tobogoŋŋiŋ fuliŋgoŋ hinek imeŋgwaŋ nabugoŋ halimilak doktiŋa unduŋ tuguk. <sup>8</sup>Ala uyadi nadinadi fuliŋgoŋ eŋ nadidakale hinek diniŋ hinaulibiŋiŋ gineŋ tiulidokooŋ welenik gineŋ kadahinimguk. <sup>9</sup>Unduŋ tiŋa yeguk e' ne kubugoŋ mede koom nadiune tuwot tubune Kilisto foloŋ yofafaŋeguk u hebiŋiŋ hali buguk doktiŋa indiŋ ninimbihikuk:

<sup>10</sup>“Nu didimeniŋgoŋ katuwalene wooŋ nai tugut foloŋgoŋ usuwaune Kilistodi nemenemek hogohogok, kunum gineŋ be kwetfoloŋ, kiudapmaŋ wendiniŋ molom hinek tibaak.”

<sup>11</sup>Bepaŋ nemenemek hogohogok ne nadidapmaŋ yokwambunda tilakdi Kilisto aditegoŋ tiŋa koomkwaha nihitubudakaleeŋ netok nibukahileeŋ ninindapmaguk. <sup>12</sup>Adi indiŋ yoŋa nibukahileeŋ ninindapmaguk: Indi timentimeŋ tububihila Jesu Kilistodok nadikunakunale tihatigumundi adi'walaŋ wougigit holiholiŋenit wondoktiŋa u hati-niutumbayaneem. <sup>13</sup>Ala hidi maŋ mede folooŋ hinek eŋ hehitubu-lodadok Mede Momooŋ u nadidahi tiŋa Kilisto nadisukilitimiŋiŋ. Unduŋ doktiŋa Uŋgoŋiŋ Munabuli timenŋ nimdok yokwambundaguk u hambune adi'walaŋ feknit tigiŋ. <sup>14</sup>Kunum gineŋiŋ bomboŋ inditok gigit hatak wondiniŋ yofolok u Uŋgoŋiŋ Munabuli nimŋit. Unduŋ tiŋa Bepaŋ ne wou wapum loloŋnitdok tonadifo wapum titiŋdok Munabulidi menjimenŋye indi'walaŋkade kwanai tububihikuk u titawooŋ tubudapmawaak.

### **Poldi Efesohidok Bepaŋ ninadiguk**

<sup>15</sup>Kaŋ hidi Wapum Jesu nadisukilitimiŋiŋ eŋ meeniŋ nadisukilitihinit notniŋye hogohogok welesiloŋ tiyemiŋiŋ, wondiniŋ mede kahat nadigut doktiŋa <sup>16</sup>helemahelemaŋ hiditok nadisuŋa Wapum welemomooŋ nadimiŋa niutumbalat. <sup>17</sup>Unduŋ tiŋa hiditok tiŋa Bepaŋ indiŋ ninadilat. Wapumnik Jesu Kilisto adi'walaŋ Bepaŋ eŋ Beu tinahukutŋiŋ hautanit hinek, adi Uŋgoŋiŋ Munabuli hambune Wapum'walaŋ mebi u kedem hanimbihilune nadidakaleeŋ nadinadi fuliŋgoŋ u moŋgokaneŋ. <sup>18</sup>Unduŋ tiŋa welehiŋ diniŋ dauhiŋ tubutombune Wapumdi hanagila kunum

diniņ nemek momooņ hiditok gigit yoguk u hanindakaleune kaņ wondok nadiune folooņ tuluwaak. Eņ netok mebit hidi kunum diniņ hatihati fafaņeniņ hamulak wondok maañ nadikunakunale tiņa hatiyaneer. <sup>19</sup>Eņ nadisukilitininit indi'walaņkade saņiniņņiņ wapum kakaņ hinekdi kwanai tilak indigoņ tuwot tubumintaguk, wondok maañ nadiune folooņ tibaak.

<sup>20</sup>Saņiniņ wondiniņ mebi indij: Kilisto kumuņ gineniņ tubukaikaañ kunum gineņ kohoņ didimeniņņeņkade kameer miņgoņ tubumintanimguk. <sup>21</sup>Unduņ tiņa munabuli eņ gapman eņ mapme, be metam saņiniņhinit be wohikgigit loloņnit hatiņ, adi'walaņ loloņnit wapum kameguk. Unduņ doktiņa kwetfoloņ be kunum foloņ wohikgigit hatak wondi haņjindalak. Uyadi nai kobudok hogok moņ, uyadi fafaņeniņ undugoņ hatuwaak. <sup>22</sup>Unduņ tiņa nemenemek hogohogok hebeņ foloņ tubudumula kayoņ falipmeņ yehibopneer Yabudokohik hatidok nindapmaañ, kayoņbop'walaņ Kadoko wapum kameguk. <sup>23</sup>Kaņ adi kayoņ kohoņ tubune ne'niņ titiņņiņdi dahitoki timilak, unduņ tiņa ne kwetkwet tokidapmaañ hatiņila nemenemek hogohogok yabudokodapmalak.

### Koomkwaha hatihati hogoli hatigiņ

**2** <sup>1</sup>Hidi koomkwaha kadakanij hogoli hinek tiņa kumuhi hatigiņ. <sup>2</sup>Uyadi kwetfoloņ hatihati tali foloņ hatigiņ. Unduņ hatiņila kunum kwet lekiņgoņhik foloņ hamap hatakneņ uņoņ munabuli hogohi hatiņ adi'walaņ mapmehik'walaņ mede tiloloņ tihatigiņ. Adi'walaņ munabulidi nai indidegoņ biyagoņ hinek metam mede wobuhinit'walaņkade kwanai tilak. <sup>3</sup>Indi maañ koom aditok tuwolit hatidapmaañ welenik komi diniņ nadigalika moņgola hatigumun. Tiņa foloonik diniņ eņ welenik nadisunik diniņ mede tiloloņ tiņa, adi undihi mintaaņ kumuņdok gigit tugumun.

### Bepaņdi nihitubu-kaikaañ kunum gineņ hatidok nipmeguk

<sup>4</sup>Indi unduņ hatigumun iņgoņ Bepaņ adi welekulemaņiņ wapum halimilak doktiņa welesiloņ wapum tinimiņa <sup>5</sup>mede wobunik doktiņa kumuņgumun indi Kilisto dut wanaņ nihitubu-kaikaguk. Nadiiņ be? Hidi yadi siloņ tobogoņņiņ doktiņa hehitubu-kedebaguk. <sup>6</sup>Biyagoņ kuyoņ, adi yadi Kilisto Jesu gut wanaņ nihitubu-kaikaañ saņiniņņiņ nimiņa kunumdok gigit wanaņ nipmeguk. <sup>7</sup>Uyadi kougoņ mindaņkade indij mintadok yoņa tuguk. Kougoņ adi, adi'walaņ siloņ tobogoņ muse wapum woņ adi Kilisto Jesudut welekulema tinimiņa taņakiyenimbaak. <sup>8</sup>Nadiiņ be? Adi siloņ tobogoņ tihamuņa nadisukilitihik doktiņa hehitutumbaguk. Uyadi hide nemek niņ tubune moņ. Bepaņ welesiloņņiņ doktiņa unduņ tihamguk. <sup>9</sup>Be kwanai niņ tigiņ doktiņa wondiniņ tuwanaņ mu hamuņguk, uyadi moņ. Unduņ doktiņa hide'walaņ wohiye mu yoņa tiloloņdok. <sup>10</sup>Indi yadi Bepaņdi Jesu Kilisto doktiņa metam gitipmuhi

nihitubu-mintalak. Tiņa koom titiņ kedem Bepaņđi metamņiyedi keledok nadiguk uņņon takalidok ninilak.

### **Behepneņhidi yopmaņ busuwagiņ**

<sup>11</sup>Hidi yadi Judahi moņ, tiņa Judahi'walaņ feknit mokit. Kaņ Judame heki adi foloohik foloņ fekhinitdi hiditok fekhinit mokit haniņ. <sup>12</sup>Agan nadiņ. Koom hidi Kilistonit mokit hatiyagiņ. Tiņa Isilae me adi yokwet molom unduņ hatilune hidi nalum hatigiņ. Eņ adi yadi netok mebit yeniņa yokwambunda mede yembune hidi niņkadehi tiņa kohombalim hatigiņ. Biyagoņ hinek, unduņ tiņa welehikdi nemek foloņ niņdok nadikunakunale mu tiņa Bepaņnit mokit hatigiņ. <sup>13</sup>Nai indidegoņ adi hidi Bepaņ'walaņ hatihati mu nadiņa kweetniņ hatigiņđi Kilisto Jesudut kadiņa Kilisto'walaņ naņgatđi hehitubu-walandaune Bepaņ'walaņkade busuwaañ hatiņ.

### **Jesudi mik-kwadi ulatiņa foune welekubugoņ tugumun**

<sup>14</sup>Kilisto negoņ kulema tubumintanimbune bop kubugoņ tiyam. Adi'walaņ kulemadi mebop lufom hatigumun lekiņņoņnik foloņ mik-kwadidi kamehep fafaņeniņ hakuk u wiyakula, nihikiulune bop kubugoņ tiņa hatiyam. <sup>15</sup>Uyadi Moses'walaņ Yodoko Mede gineņ dokoniņgoņ eņ yohepyohep fee yoņit u ne'walaņ sigiņđi Bepaņdok dumuņ hemiņa tumolokukuk. Unduņ tiņa mebop lufom adi'walaņ kwehikoņ foloņ mebop gitipmuņ, kubugoņ tubumintaune kulema mintaguk.<sup>a</sup> <sup>16</sup>Adi kolonđabek foloņ kumuņa mebop lufomuk u niniņkulemaañ nihikiulune kubugoņ mintanene Bepaņ dut nihikiukuk. Unduņ tiņa mik-kwadi hakuk u ulune foguk. <sup>17</sup>Unduņ tiņa busuwaañ niņkadehi hatigiņ hidi eņ Bepaņ'walaņ metam hatigumun indi wanaņ kulema diniņ mede ninimbune nadigumun. <sup>18</sup>Tiņa undugoņ talik tubudidimenimguk doktiņa indi Munabuli kubugoņ kahileeņ Baņ'walaņkade yawam.

### **Jesu'walaņ kayoņbop adi Bepaņ yoli**

<sup>19</sup>Unduņ doktiņa nai indidegoņ nalum eņ buit mu hatiņ. Hidi yadi agañ metam nadisukilitihinit noli adut yohiwahi tigiņ eņ Bepaņ'walaņ kayoņbopņiye tigiņ hatiņ. <sup>20</sup>Bepaņ ne kayoņbopņiņ u aposel eņ polofet heki'walaņ kwanaihik foloņ tubumintaguk. Eņ kayoņbop wondiniņ daņiniņ adi Jesu Kilisto ne tuguk. <sup>21</sup>Adi'walaņkade metam nadisukilitihinit hogohogokđi tomboyoutnene bediņa Wapum'walaņ Siloņyot uņņoniņ tilak. <sup>22</sup>Biyagoņ kuyoņ, Uņņoniņ Munabulidi hidi undugoņ adi'walaņkade hehitomboyoulune Bepaņ'walaņ yoli tiņ.

<sup>a</sup> **2:15** Judame Yodoko Mede takaligiņ eņ me niņkadehi indi Jesu Kilisto nadisukilitimiņa bop gitipmuņ kubugoņ mintanene kulema mintalak. Judame Yodoko Mede kamehatiņa Bepaņ mu nadisukilitimiņgiņ adi Bepaņ sigilulum timiņgiņ doktiņa adi molomgoņ hatiņ.

### Mede hebiniŋ halibuguk u Wapumdi Pol nimbihikuk

**3** <sup>1</sup>Biyagoŋ hinek, Pol nu yadi Judahi'walaŋ feknit mokit hidi Kilisto Jesu'walaŋ mede hanihautagut doktiŋa yot fafaŋeniŋ gineŋ napmegiŋ kaŋ hatilat.<sup>b</sup> <sup>2</sup>Hidi nu'walaŋ mede kahat agaŋ nadigiŋ. Bepaŋ adi siloŋ tobogoŋŋiŋ doktiŋa hidi'walaŋkade Jesu'walaŋ Mede Momooŋ diniŋ kwanai titiŋdok naniŋguk. <sup>3</sup>U naniŋa mede hebiniŋ maan nanimbihikuk. Mede u agaŋ muniniŋ-kabe youlat. <sup>4</sup>Hidi u yokunali, nu Kilisto'walaŋ mede hebiniŋ u walanedi nadidakalelat u kedem nadineej. <sup>5</sup>Mede hebiniŋ uyadi metam koom hatitalabugiŋ adi mu yenimbihiliŋjit. Uŋgoŋiŋ aposel eŋ polofet indi adigili Munabulidi mindaŋ ninimbihikuk. <sup>6</sup>Mede hebiniŋ u indiŋ. Metam Judahi'walaŋ feknit mokit hidi Jesu'walaŋ Mede Momooŋ wondoktiŋa Judame indut kiula bop kubugoŋ tiŋa Bepaŋ'walaŋ metam mintaaŋ hatiyam. Tiŋa Kilisto Jesu'walaŋkade gigitmededi folooŋnit tuguk u wanaŋ kahileej kame hatidok yoŋit. <sup>7</sup>Ala nu Jesu'walaŋ Mede Momooŋ wondiniŋ tipilapilaye hatibaat yoŋa Bepaŋdi siloŋ tobogoŋŋiŋ doktiŋa saŋjiniŋŋiŋ wapum halimilak wondiniŋ mebi nu foloŋ tubumintaguk.

### Mede hebiniŋ diniŋ folooŋ Jesudi tubumintaguk

<sup>8</sup>Biyagoŋ kuyooŋ, Kilisto'walaŋkade duhuduhu wapum kameka titiŋdok tuwot moŋ, u metam Judahi'walaŋ feknit mokit yenihautawaat yoŋa wondok kwanai fofooŋ Bepaŋ'walaŋ kwanai-me fofooŋnit nu naniŋit. <sup>9</sup>Mede hebiniŋ yohautawaat yoŋa yoŋit uyadi indiŋ. Bepaŋ, nemenemek tubumintaguk, adi helemahelamaŋ nadinadiŋiŋ hebiniŋ u kabup welen maaneŋ nadihabiyeeune halimiŋtalabuguk. <sup>10</sup>Ala yoŋ adi Bepaŋ'walaŋ kayooŋbopŋiye indi'walaŋkade nadinadi fuliŋgoŋ halimilak diniŋ folooŋ taŋakiyeune kudiŋiŋ mebimebi mintaune kunumnehi loloŋhinit eŋ saŋjiniŋhinit hatiŋiŋ adi maan kakiyondaiŋ. <sup>11</sup>Biyagoŋ hinek, Bepaŋ adi koomkwaha nainit mokitneŋ welen maaneŋ nadihebet tuguk wondiniŋ folooŋ, Wapumnik Jesu Kilisto, niŋkulune foun mintadakaleguk. <sup>12</sup>Biyagoŋ hinek, Jesudigoŋ talik tubudidimenimbune adi nadisukilitimiŋa Bepaŋdi kedem nadinimbek yoŋa munta mu tiŋa niutumbaaŋ ninadiyam. <sup>13</sup>Unduŋ doktiŋa indiŋ hanimbe nadineej. Nu hiditok tiŋa mik-kwadi foloŋ hatibene hidi wondoktiŋa welehik mu gweheyewaak. Moŋ. Hidi adi tobo wendi hehitubu-lodaune Bepaŋgut momooŋ hatineem wondok nadifo tiyaneej.

### Poldi Efeso metamdok Bepaŋ ninadiguk

<sup>14</sup>Biyagoŋ kuyooŋ, wondegoŋ tiŋa kunum gineŋ be kwetfoloŋ metambop hatiyam tuwot <sup>15</sup>inde'walaŋ Betnik folooŋ i mulelem timiŋa hiditok indiŋ

<sup>b</sup> **3:1** Yowo 1 gineŋ Poldi ninadi tububihitdok tuguk iŋgoŋ wabiŋa Yowo 2 wooŋ 13 gineŋ uŋooŋ ne'walaŋ kahat yodakaletauyeŋ Yowo 14 gineŋ kotigoŋ ninadi tububihila youkuk.

yonga ninadi hatilat. <sup>16</sup>Bepaŋ lolonŋit hinekdi ne'walaŋ wougigit diniŋ duhuduhu wapum waaniŋ hatak haamdok yoguk u Munabuli nimbune adibo saŋiniŋ hambune welehiŋ bedinaditom tibaak. <sup>17</sup>Unduŋ tiŋa Kilisto nadisukilitiune adi welehiŋ kahileeŋ uŋgoŋ hatiluwaak. Unduŋ tubune hidi adi'walaŋ welesiloŋ gineŋ ulodi-kwambundaŋ yakaneŋ. <sup>18</sup>Unduŋ tiŋa metam nadisukilitihinit nolidut wanakaŋ hogohogok bopneŋ Jesu adi weleŋ hinekdi nibukahileguk wondiniŋ mebi, boki, kolon eŋ dabekniŋ u wanaŋ lodaŋ nadidakaleneŋ. <sup>19</sup>Tiŋa Kilisto'walaŋ welesiloŋ metam'walaŋ nadinadi kalakapmedapmalak u fiit nadihinakayaneŋ. Unduŋ tubune Bepaŋ'walaŋ weleŋ gineŋ duhuduhu toki tiŋa itak wondi dahitokihamuluwaak.

#### Yonadifo mede

<sup>20</sup>Biyagoŋ hinek, Bepaŋ adi saŋiniŋniŋ diniŋ mebi indi'walaŋkade tubumintaguk uyadi nemek tilak wondi yonadinik eŋ nadinadisunik u kalakapmedapmalak doktiŋa <sup>21</sup>kayonŋbopdi Jesu Kilisto wou foloŋ tonadifo wapum tubune Bepaŋ'walaŋkade tonadifodi youdihinit haliwoon halaak, fafaŋeniŋ. U biyagoŋ.

#### Munabulidi nihikiulune bop kubugoŋ tiŋa hatiyam

**4** <sup>1</sup>Nu Wapum'walaŋ medeniŋ doktiŋa yot fafaŋeniŋ gineŋ napmegiŋ, ala yot fafaŋeniŋ gineŋ itatdi haniŋkilitiŋa indiŋ hanimbit. Jesu'walaŋ titiŋ didimeniŋ keledok hanihehimaneniŋ wendok tuwot uŋakoŋ keleeŋ hatiyaneŋ. <sup>2</sup>Unduŋ tiŋa hidetok nadiune foune kulemaŋgoŋ eŋ nadikulema tiŋa hatiŋila welesiloŋ foloŋ nohiye'walaŋ yom biyemiŋa kiulihi eŋ kitubuloda tiyaneŋ. <sup>3</sup>Tiŋa Uŋgoniŋ Munabuli adi kulema diniŋ tawadi hehikiula hehi-ibiguk doktiŋa hidi gineŋ welekubugoŋ tiŋa hatiyaneŋ.

<sup>4</sup>Biyagoŋ kuyonŋ, foloonik adi kubugoŋ eŋ Uŋgoniŋ Munabuli kubugoŋ, tiŋa kunum kubugoŋdok nadikunakunaledok gigit haniŋa hanihehimaneniŋ. <sup>5</sup>Tiŋa undugoŋ, Wapum adi kubugoŋ, nadisukiliti kubugoŋ, Imeyout kubugoŋ. <sup>6</sup>Eŋ Bepaŋ adi kubugoŋdi nihikiula betnik kubugoŋ tilak. Adi wanakaŋ hogohogok nihikiudapmaŋ Wapumnik hatiŋa welenik molomolom saŋiniŋ dahinimilak eŋ welenik gineŋ molomolom ipilat tinimilak.

#### Wapumdi kwanaidok metam mebimebi nipmeguk

<sup>7</sup>Kilisto adi metam kwanaidok siloŋ tobogoŋ molomolom daneŋ nimguk kaŋ moŋgola hatiyam. <sup>8</sup>Unduŋ doktiŋa Youkudip Mede niŋ indiŋ hinek hatak:

“Adi wahiŋ hinek loŋila metam folok gineŋ hatigiŋ wanaŋ yahaŋeeŋ loguk. Unduŋ tiŋa meeniŋ siloŋ tiyemguk.”

<sup>9</sup>“Wahin loguk,” uyadi hogok mu yonjit. Kwetfolon fulingon hinek foguknenin udaneen loguk. <sup>10</sup>Adi yadi fogukdi udaneen kunum hogohogok yalakapmedapmaan loguk. Biyagon kuyon, adi yadi kunumkwet tokidapmaan hatidok loguk. <sup>11</sup>Tija adigon metam noli aposel nipmeguk, noli polofet, noli adi Jesu’wala Mede Momoonji sanjini nit weleyouyout tiyembune welelik tubutakalein,<sup>c</sup> noli Jesu’wala dompa bop yabudokodok en metam yeniyehitubu-didimedok yapmeguk. <sup>12</sup>Uyadi metam nadisukilitihinit yehidaneen yenintubudidimeen yehitubu-kilitiune kayon bop dinin tipilapilaye kwanai tineen ka Kilisto’wala kayon, kohon, foloon bedikiliti titindok metam undun nipmeguk.

### Nadisukiliti gilangilan mu titindok

<sup>13</sup>Undun be undun titawanewane nadisukilitinik en Bepan mihinin dinin mebi wendi nadinadinik tuwot tokidapmaune welekubugon tineem. Undun tija nadisukiliti folon bedinaditom u titinikdok tuwolit yonjit uye Kilisto’wala tinaulibi ginenin sanjini mongola bedinaditom titawoon kilitihi tija tubumintaneem. <sup>14</sup>Indi helemahelama wapmihi-kabe nabugon mu hati fafaen hatiyane metam tikamanda tiin di yala ninimbune nilamuthik dinin mededi nihimaule ninigilune ujanbuat mu tinim, en yotubufithik dinin sububadi tuwot mu nihifedimadilaak. <sup>15</sup>Mon. Indi yadi mede foloon didimeningon kamehatinene welesilonnikdi mintaulihaka-taulune mebinik Kilisto adi folon tomboyoutneem. <sup>16</sup>Adut tomboyoutnene sulusulu be muun hogohogokdi nihikiula ibikilitiune kugali tija kayon kohon tineem. Undun tija dikinnye hatinila sanjini hatnimilak tuwot kwanai titawoon welesilonnit mintaulihaka tineem.

### Nadisukilitinit mokit mu hatidok

<sup>17</sup>Nu Wapum namanda folon hanihinakawit. Hidi metam nadisukilitihinit mokit adi nadifile tihatiin, adi undi kotigon mu hatiyaneen. <sup>18</sup>Adi yadi welelik mambip tuguk doktija nadidakale mu tigin, en welekwambu tija Bepan’wala hatihati sigilulum timingin. <sup>19</sup>Undun tija welelik teheune mekanit mokit nana kale wapum tinagalika tija siloda mebimebi lakatanit mokit tihatiin.

<sup>20</sup>Hidi yadi hatihati undin hatidok yona Kilisto’wala mebi mu hanindidimenit. <sup>21</sup>Hidi yadi mebin hanindidimenit nai unjan mede foloon indin hinek hatak unakon nadigin. <sup>22</sup>Nadisukilitinit mokit hatihati koom hatiyagin u sigilulum timina welelik komi tikamanda tija siloda gine kadakalak u kwihikutneen. <sup>23</sup>Undun tija Munabuli nadimimbune

<sup>c</sup> 4:11 Wou noli ewengelis yoinj.

nadisuhik tubukaikaune <sup>24</sup>welelik kobuli mintawaak. Biyagoŋ kuyoŋ, uyadi Bepaŋ ne'walaŋ folonamandap undiniŋ didimeniŋ eŋ uŋgoŋiŋ hinek tubumintaguk.

### **Kadakaniiŋ mebimebi moŋ yoŋa wabidok**

<sup>25</sup>Unduŋ hatiŋa hekinolit tubudapmayam doktiŋa hidi yalaŋ wabiŋa mede biyagoŋ hogohogok kiyonadi tiyaneer. <sup>26</sup>Kwihita mebinit adi kedem tiyaneer, iŋgoŋ kwihita tiŋa kadakaniiŋ adi mu tiyaneer. Kwihita belep kame hatilune mele mu fohebiluwaak. <sup>27</sup>Tiŋa Sadaŋ nadigweheyemiŋa baŋam-kabe nemu miyaneer. <sup>28</sup>Eŋ kubo tihatilakdi kubo wabiŋa kohoŋdi kwanai fafaŋer tiŋa nanaje bombon yehitubumintaŋ fofonjhinit siloŋ tiyemuluwaak. <sup>29</sup>Mahik gineŋ medehaki mu labuluwaak. Mede kedem hogok adigili kiulihi titiŋdok talik mintaune yobune metam not tiyemiluwaak. <sup>30</sup>Bepaŋ'walaŋ Uŋgoŋiŋ Munabulidok welemulap mu miyaneer. Biyagoŋ kuyoŋ, adigoŋ Bepaŋdi agaŋ nibukahileguk wondiniŋ fek tinimilakdi nai wapum foloŋ wotniniye yobihilaak. <sup>31</sup>Nadikadaka komi, kwihita belep, tosiwe, kinisuwambat, tiŋa nemek kadakaniiŋ noli uyadi lekiŋgoŋhik foloŋ mu mintaluwaak. <sup>32</sup>Hidi yadi hekinolit foloŋ tiŋa kitubuloda tiŋa yom bibiŋ tiyaneer. Bepaŋ adi Kilisto doktiŋa undugoŋ hinek tiŋa yomhik tumolokukuk.

### **Kadakaniiŋ yotumolokut tiŋa hatidok**

**5** <sup>1</sup>Hidi yadi Kunum Behikdi habukahile hinek tilak doktiŋa wapmihiniye hidi ne hatilak undugoŋ katuwali hatiyaneer. <sup>2</sup>Unduŋ tiŋa welesiloŋhinit hatiyaneer. Kilisto adi unduŋ tiŋa welesiloŋ tinimiŋa ne'walaŋ foloŋ u nadidapmaŋ biune Bepaŋdok hemundumunduŋe momooŋ tuguk.

<sup>3</sup>Indiŋ hinek nadidok. Metam hatifile tiŋ, eŋ siloda kadakahi tiŋ, eŋ nehitoŋ hogok nadiiŋ, titiŋ undihidok mede hamahamap hide'walaŋ lekiŋgoŋhik gineŋ adi mu mintaluwaak. Bepaŋ'walaŋ metamdi titiŋ undihi mu tiyaneer be yonadiyaneer. Moŋ hinek. <sup>4</sup>Mede mekaŋ, eŋ mede kauler, eŋ medehaki, undihi yobune kadakawaakneŋ ala tonadifo adigili kedem tubune tuwot tuluwaak. <sup>5</sup>Hidi indiŋ hinek nadikwambundayaneer. Biyagoŋ hinek kuyoŋ, metam hatifile tiŋ, eŋ siloda kadakahi tiŋ, eŋ nehitoŋ hogok nadiiŋ, eŋ yabap eŋ tubuhi moŋgo hatiŋ, adi yadi kunum gineŋ Kilisto eŋ Bepaŋ'walaŋ yohikwehineŋ hatihati fafaŋeniŋ hatak u lohi tineer.

### **Nemek mekaŋ uye kabup hebi-hatiŋila mu titiŋdok**

<sup>6</sup>Halamut tiŋa yalaŋ mede hanimbune nadiune foloŋ mu tiluwaak. Biyagoŋ kuyoŋ, kadakaniiŋ undihi doktiŋa Bepaŋ'walaŋ kwihita diniŋ kibikoŋ metam mede wobu tiŋ adi'walaŋkade mintawaak. <sup>7</sup>Unduŋ



doktiņa hidi mu yehitubu-lodayaneņ. <sup>8</sup>Hidi koom mambip gineņ hatiyagiņ, eņ nai indidegoņ adi Wapum'walaņkade busuwaañ hautanit tigiņ hatiņ. Unduņ doktiņa hauta diniņ yalakiņiye tiņa adi'walaņ folonamandap tiņa hatiyaneņ. <sup>9</sup>Hautanit hatihati diniņ folooņ adi indin mintalak. Welemomooņ hatihati, eņ didimeniņ hatihati, eņ mede biyagoņ yoyo. <sup>10</sup>Ala nemenemek tine nadiņa adi Wapumdi nadiune kedebawek be moņ u timerņ nadidakalehinakaañ tiyaneņ. <sup>11</sup>Eņ nolidi mambip diniņ nemek folooņhinit mokit tubune u mu yehitubu-lodayaneņ. Moņ, hidi adi tobo titiņ undihi u yenihep tiņa mu titiņdok yeniyaneņ. <sup>12</sup>Nemek kabup tihebiiņ u yehiwehemila yonene mekaņgoņ iņgoņ tibek. <sup>13</sup>Nemek undiniņ namokopņiņ u Bepaņdi udikulune hautadi tubuhautaune miņgoņ mintawek. Kaņ nemek miņgoņ mintalak wendi maañ hauta foloņ hatuwaak.

<sup>14</sup>Biyagoņ kuyoņ, unduņ doktiņa indin yoiņ. "Damo deihatilaņ ale pilat, eņ kumuņ gineniņ kaikaañ pilaleņ, kaņ Kilistodi gehitubu-hautawek."

#### **Nadigiyonda tiņa nai mu tubukadakadok**

<sup>15</sup>Hidi yadi hatihati be titiņhik didimeniņgoņ kadokoyaneņ. Tiņa kauliņgoņ moņ, nadinadiņila hatiyaneņ. <sup>16</sup>Nai indidegoņ adi kadakaniņdi hautagak hatak doktiņa nai noli tubukadakafit mu titiņdok, kwanai fafaņe tiņa tiyaneņ. <sup>17</sup>Nadinadihinit mokit nabugoņ mu hatiyaneņ, Wapumdi kwanai hanilak u yabunadidakaleeņ tiyaneņ. <sup>18</sup>Wain ime heki kisaņ naañ nadibubuye mu tiyaneņ.<sup>d</sup> Uyadi wele tubukadaka kwanai. Uņgoņiņ Munabulidok adigili gigne tubune fotokihamuluwaak. <sup>19</sup>Munabulidi hehitubu-lodaluluwaak tuwot niutumba kap eņ kap gitipmuhi be komi toņa welehik eņ nadinadihikdi kibikibi tiyaneņ. Unduņ tiņa welehik gineņ kapdi eņ baiwagimdi Wapum wou nintiņalooņ niutumbyaneņ. <sup>20</sup>Unduņ tiņa Wapumnik Jesu Kilisto doktiņa helemahemaņ Bepaņ Betnik nemek mebimebidok ninadifo tiņa niutumbyaneņ.

#### **Tamwoi yohohiyehinit'walaņ mede**

<sup>21</sup>Hidi yadi Kilisto gikiņgoņ timiņa mede tiloloņ kibikibi mohinek tiyaneņ. <sup>22</sup>Tamwoi yohohiyehinit, hidi Wapum'walaņ mede tiloloņ tiiņ undugoņ yohohiyedok tiyemaneņ. <sup>23</sup>Biyagoņ kuyoņ, me tamņiņnit adi yadi tamņiņ diniņ kaulidoko hatilak, undugoņ Kilistodi kayoņbop diniņ kaulidoko hatilak. Unduņ tiņa kayoņbopņiye kadakaniņ gineniņ ninigitdok kumuņguk. <sup>24</sup>Unduņ doktiņa, kayoņbopdi Kilisto'walaņ mede

---

<sup>d</sup> 5:18 Wain ime heki mintalak wooņ adi nemek noli fafaņehi naañ nadibubuye tiiņ wendok maañ kiula yolak.

tilolonj tilak undugonj, tamwoi yohohiyehinit adi maanj helemahelemaanj yohohiye'walañ mede tilolonj tiyemaneenj.

### Mewoi tamhiyehinit'walañ mede

<sup>25</sup>Mewoi tamhiyehinit, hidi tamhiye welehidki yabukahileyaneenj. Kilisto adi undugonj kayonjbopnjij u welenđi kahileenj aditok tiña kumuñguk. <sup>26</sup>Kilisto adi medeñjndi eñ imedi kayonjbopnjij youtewalandagak. <sup>27</sup>Unduñ tiña kayonjbopnjij netok kahileenj tinahukulimiña netok gigit ungonij eñ kadakanijñnit mokit niñguk. <sup>28</sup>Tiña mewoi tamhiyehinit adi nehi'walañ foloohik yabudokoij undugonj tamhiye maanj yabudokoyaneenj. Me niñ adi tamñij welesilonj timimbaak adi yadi ne'niñ welenđok eñ sigiñdok welesilonj timilak unduñ tibaak. <sup>29</sup>Me niñ adi ne'walañ foloonj mik-kwadi mu timiña momoonj hinek kadakoonj miñtoi tihatilak, wondok tuwot Kilistodi kayonjbopnjij undugonj timilak. <sup>30</sup>Biyagonj kuyonj, indi yadi Kilisto'walañ kayonj kohonj dikiñjiye hatiyam. <sup>31</sup>Unduñ doktiña me niñ adi miñbeu biyabuña tamñij dut woonj galiune adi welehid be foloohik kubugonj tiña hatidemee. <sup>32</sup>Uyadi mede hebiniñ, eñ mebiñij fulij hinek, ala Kilisto eñ kayonjbopnjij aditok nadiña yolat. <sup>33</sup>Me tamhiyehinit hogohogok, hidi hide'walañ foloohik welesilonj timiij tuwolit undugonj tamhiye silonj tiyemaneenj. Eñ tamwoi yohohiyehinit, hidi yadi yohohiyedok nadiune loune gikiñgonj tiyemaneenj.

### Mañbañ eñ wapmihi'walañ mede

**6** <sup>1</sup>Wapmihi, hidi Wapum doktiña mehim-behiye'walañ mede tilolonj tiyemaneenj. Woñ adi titiñ momoonj. <sup>2</sup>Du manje bahadok nadiune loloñnit tibaak. Uyadi Moses'walañ Yodoko Mede eñ indij maanj tomboyoula yofolokeneguk, <sup>3</sup>“Hidi unduñ tubune Bepañdi habuña hehikahañneune kwetfolonj gulet fee momoonj hinek hati moloneenj.”

<sup>4</sup>Bañ heki, hidi yadi wapmihihiye kadakanij tiña gweheye tineeneñ ala nemek kaka mu tiyemaneenj. Hidi yadi Wapum'walañ mede yenija yenikiliti eñ munte mede yenija yabudokoune Bepañ'walañ gigitmede ginēñ bediyaneenj.

### Me bombonji eñ tipilapilaye heki'walañ mede

<sup>5</sup>Tipilapilaye heki, hidi kwet diniñ me bombonjihiye gikiñgonj tiyemiña Kilistodok timiij undugonj aditok maanj gikiñgonj tiyemiña welehidki mede tilolonj tiyemaneenj. <sup>6</sup>Hidi me bombonjihiye dauhik folonj kwanai tikamakamañe tubune bombonjihiyedi haniutumbadok nadiña mu taneenj. Indi Kilisto'walañ tipilapilaye, unduñ yoña, Bepañdi talik yoguk u welehidki nadilodañ takaliyaneenj. <sup>7</sup>Metamdok nadiña monj, Wapumdok nadiña kwanaihiñ hañindanit mokit taneenj. <sup>8</sup>Hidi

agan nadiiŋ. Nebek niŋ adi tipilapilaye-me be me bombonŋi hatiŋila nemenemek kedem tihatibaak adi yadi Wapumdi tuwanŋiŋ wendok tuwot mimbaak.

<sup>9</sup>Kaŋ kibi me bombonŋi heki, hidi maan unduŋoŋ, tipilapilayehiye momooŋoŋ tiyemaneen, tiŋa kisaŋ mu yenintoŋa yehitubu-kadakayaneen. Tiŋa indiŋ nadiyaneen: Me tipilapilaye tilak be me bombonŋi, hidi'walaŋ Wapumhik adi kubuŋoŋ, kunum gineŋ hatilak. Adi yadi woŋgaliŋ buŋagaliŋ mu tilak. Ala titiŋnik wondok tuwot hinek kibikoŋnik nimbaak.

### Memik hebiŋiŋ hatiŋ

<sup>10</sup>Yodapmanŋdok indiŋ yobe. Wapum'walaŋkade wooŋ galiune saŋiniŋŋiŋ wapumdi hidi'walaŋkade meŋeŋa hehitubu-kilitiune saŋiniŋhinit hatiyaneen. <sup>11</sup>Unduŋ tiŋa Bepaŋ'walaŋ bohomo en kweletalak en mik diniŋ bombon moŋgola yohoneen hatiŋa Sadaŋ'walaŋ tikamanda be halamut u kakiyondaan kelekuŋfali fafaŋeŋ yakaneen. <sup>12</sup>Hidi agan nadiiŋ. Indi yadi memik foloohik gomnit adut mindobu mu tiyam. Moŋ. Kaulidoko wapum en mik molo, nai indidegoŋ mambip hatak wondiniŋ munabuli fafaŋehi, yabap moihi kadakahi hamap gineŋ hatiŋ, adi memik tinimiiŋ. <sup>13</sup>Unduŋ doktiŋa Bepaŋ'walaaniŋ tebe bohomo en kweletalak en mik diniŋ bombon hogohogok moŋgola behatiŋa mik nai gineŋ fafaŋeŋ, kiŋgineŋ yalune memik hekiyen moŋ tikaŋ bihabuŋa momoyaneen.

### Mik bombon moŋgo hatidok

<sup>14</sup>Hidi adi indiŋ tiŋa hatiyaneen. Mede folooŋ hinekdi kiyegelephik tubune youkilitiyaneen, en hatihati didimeniŋdi muhaulehik tubune mukaneen, <sup>15</sup>en kulema diniŋ Mede Momooŋ tiulidokoŋ behatiyaneen, kaŋ wondi kayohik diniŋ namokop tubune dahiune foune yalikilitiŋ unduŋ tiluwaak. <sup>16</sup>Tiŋa daŋiniŋ wapum hinek adi nadisukilitidi kweletalakhik tubune helemahelamaŋ kwehene-tiŋaloŋ kameyalune kadakanŋ molom diniŋ tebe mahik mikitdi siŋgalalapneen mayaneen. <sup>17</sup>Tiŋa niŋ kulun fafaŋeniŋ, wou "Bepaŋdi nihitubu-kedebaguk" u mokoyaneen en Munabuli'walaaniŋ bohomo mikit Bepaŋ ne'walaŋ medeŋiŋ hinek u kamehatiyaneen. <sup>18</sup>Hidi nai tuwolit Uŋgoŋiŋ Munabuli'walaŋ saŋiniŋ foloŋ Wapum youdihinit nemek mebimebidok nadisuŋa nimbubulubulaye tiŋa ninadiyaneen. Tiŋa hatiliweliwen mu taneen, en nadinadiŋila kikakuwat tiŋa hatiyaneen, tiŋa Bepaŋ'walaŋ metam hogohogok yokwet noli gineŋ itowiŋ aditok maan Bepaŋ ninadiyaneen. <sup>19</sup>Tiŋa nutok maan ninadi hatibune Wapumdi mane tubulodaune Mede Momooŋ hebihat tuguk u nadifo foloŋ loŋgoŋ yohautaluwaat. <sup>20</sup>Nu wendiniŋ gigit yoyodi yot fafaŋeniŋ gineŋ hali munta mu tiŋa yohautawene tuwot tibaak.

**Mede yodapman**

<sup>21</sup>Hatihatine diniŋ mebi eŋ kwanai tihatilat u mu nadineeneŋ ale Tikikusdi wooŋ mede kahat tihamdapmawaak. Adi yadi notnik momooŋ eŋ Wapum'walaŋ tipilapilaye-me mede tiloloŋnit. <sup>22</sup>Biyagoŋ kuyoŋ, adi indi'walaŋ mede kahat tihamuŋa welemomooŋ tubumintahamdok niŋkulene ulak. <sup>23</sup>Kaŋ Baŋ Bepaŋ eŋ Wapum Jesu Kilstodi notneye hidi kulema tubumintahamuŋa nadisukilitihik tubukilitiune welesiloŋhinit hatiyaneeŋ. <sup>24</sup>Wapumnik Jesu Kilisto'walaŋkade wooŋ galihinakaiŋ hidi'walaŋkade siloŋ tobogoŋŋiŋdi hatuwaak.